



## Kerjaya Prospek dapat projek RM111.8 juta bina pangsapuri

Oleh [Alzahrin Alias](#) - Januari 16, 2024 @ 3:47pm  
[zahrin@bh.com.my](mailto:zahrin@bh.com.my)



Kerjaya Prospek Group Bhd

KUALA LUMPUR: Kerjaya Prospek Group Bhd melalui anak syarikatnya, Kerjaya Prospek (M) Sdn Bhd menerima surat anugerah daripada Kerjaya Property Sdn Bhd (KPSB) bagi melaksanakan projek pembangunan kediaman di Mukim Setapak bernilai RM111.8 juta.

Projek pembinaan itu akan membabitkan sebuah bangunan utama 52 tingkat yang terdiri daripada blok pangsapuri servis 42 tingkat dan tempat letak kereta lapan tingkat yang dijangka siap dalam tempoh 40 bulan bermula 16 Januari 2024.

Ketua Pegawai Eksekutif dan Pengarah Eksekutif Kerjaya, Tee Eng Tiong berkata, KPSB adalah pelanggan jangka masa panjang kumpulan yang dipercayai.

"Memandangkan sudah biasa dengan tawaran dan jangkaan satu sama lain, kami amat yakin pembangunan kediaman ini akan dilaksanakan dan disiapkan tepat pada masanya."

"Kami juga mengekalkan trajektori kumpulan untuk mencari projek pekerjaan bernilai tinggi tambahan, sambil memberi penekanan kepada keperluan penting untuk pelaksanaan projek yang berjaya," katanya dalam satu kenyataan, hari ini.

Eng Tiong berkata, kontrak itu adalah anugerah keempat kumpulan pada tahun ini, menjadikan kemenangan kontrak terkumpul kepada RM377.9 juta.

"Ini menjadikan kami kekal optimistik tetapi berhati-hati dengan prestasi kewangan disokong oleh buku pesanan tertunggak yang cukup besar iaitu RM4.7 bilion.

"Ia dijangka mampu menyokong pertumbuhan pendapatan kumpulan," katanya.